

NACRT



SREDNJOROČNI PLAN RADA

**GRANIČNE POLICIJE BOSNE I HERCEGOVINE
ZA PERIOD 2018. – 2020. GODINE**

SARAJEVO, JUN 2017. GODINE

SADRŽAJ

Uvod	3
1. Strateški okvir	4
2. Vizija i misija	5
3. Učesnici i partneri	5
4. Osnovna programska opredjeljenja	6
Program 1: Granična kontrola i sprečavanje prekograničnog kriminala	7
<i>Projekt 1.1: Granična kontrola</i>	7
<i>Projekt 1.2: Istrage i krim-obavještajni rad</i>	9
<i>Projekt 1.3: Opremanje i izgradnja infrastrukture</i>	10
<i>Projekt 1.4: Međuinstitucionalna i međunarodna saradnja</i>	11
<i>Projekt 1.5: Obuka i stručno usavršavanje</i>	13
Program 2: Bezbjednost vazdušnih luka	14
<i>Projekt 2.1: Bezbjednosni pregled putnika, kabinskog prtljaga i obezbjeđenje prostora</i>	14
<i>Projekt 2.2: Obuka i certificiranje policijskih službenika</i>	16
5. Resursi i kapaciteti potrebni za postizanje ciljeva	16
6. Okvir za praćenje provođenja plana i evaluacija rezultata	18
7. Akcioni plan Srednjoročnog plana rada Granične policije BiH	20

Na osnovu člana 15. Zakona o Graničnoj policiji Bosne i Hercegovine („Službeni glasnik BiH“, broj 50/04, 27/07 i 59/09) i člana 7. Odluke o postupku srednjoročnog planiranja, praćenja i izvještavanja u institucijama Bosne i Hercegovine („Službeni glasnik BiH“, broj 62/14) direktor Granične policije Bosne i Hercegovine donosi

SREDNJOROČNI PLAN RADA
GRANIČNE POLICIJE BOSNE I HERCEGOVINE
ZA PERIOD 2018. – 2020. GODINE

Uvod

Srednjoročni plan rada Granične policije Bosne i Hercegovine za period 2018.-2020. godina izrađen je u skladu sa Odlukom Savjeta ministara BiH o postupku srednjoročnog planiranja, praćenja i izvještavanja u institucijama BiH („Službeni glasnik BiH“, broj 62/14) i Uputstvom o metodologiji u postupku srednjoročnog planiranja, praćenja i izvještavanja u institucijama BiH („Službeni glasnik BiH“, broj 44/15).

U budžetskoj 2015. godini Direkcija za ekonomsko planiranje i Ministarstvo finansija i trezora BiH pokrenuli su aktivnosti na harmonizaciji i koordinaciji procesa planiranja u Savjetu ministara BiH i institucijama BiH, odnosno izradi Srednjoročnog programa rada Savjeta ministara BiH. Granična policija Bosne i Hercegovine (u daljem tekstu GP BiH) ima obavezu usvojiti Srednjoročni plan rada 2018.-2020. na način propisan članom 7. navedene Odluke.

Proces izrade srednjoročnih planova rada institucija BiH još uvijek nije potpuno usaglašen sa procesom izrade dokumenta okvirnog budžeta. GP BiH je programe definisane Srednjoročnim programom rada GP BiH usaglasila sa budžetskim programima. Međutim u okviru budžetskih programa finansijska sredstva se planiraju po ekonomskim klasifikacijama, a ne po aktivnostima i projektima koji su definisani srednjoročnim planom rada. Zavisno od napretka procesa programskog budžetiranja, očekuje se da će u budućnosti programi srednjoročnog plana služiti kao osnov za definisanje budžetskih programa.

1. Strateški okvir

Zakonom o Graničnoj policiji Bosne i Hercegovine („Službeni glasnik BiH“, br: 50/04; 27/07; 59/09) propisana je nadležnost, organizacija i upravljanje Graničnom policijom Bosne i Hercegovine. U skladu sa odredbama navedenog zakona GP BiH je strukturirana s ciljem obezbjeđivanja provođenja i koordinacije svih aktivnosti i zadataka iz svoje nadležnosti na centralnom, regionalnom i lokalnom nivou, kao i da obezbijedi dvosmjernu razmjenu informacija između centralnih, regionalnih i lokalnih nivoa organizovanja, odnosno organizacionih jedinica.

Osnove organizacione strukture su propisane navedenim zakonom (član 10.) a detaljnije je ista uređena Pravilnikom o unutrašnjoj organizaciji Državne granične službe (GP BiH) broj: 15-01-02-109/05 od 05.05.2005. godine i broj: 15-05-1-02-3-1356-80/10 od 18.12.2013. godine. Pravilnikom o unutrašnjoj organizaciji Granične policije Bosne i Hercegovine, se između ostalog, utvrđuju organizacione jedinice GP BiH na centralnom, regionalnom i lokalnom nivou, njihov djelokrug rada, sistematizacija radnih mjesta, ovlaštenja i odgovornost u izvršavanju poslova i zadataka, rukovođenje u GP BiH i organizacionim jedinicama, i dr.

GP BiH je donijela svoju Strategiju rada i razvoja i Akcioni plan sa početkom realizacije 01.01.2014. godine.

Strategija GP je saglasna sa strategijama i politikama koje je usvojio Savjet ministara BiH. Prije svega to su Strategija integrisanja BiH u EU, Strategija za integrisano upravljanje granicom u BiH, Strategija za borbu protiv organizovanog kriminala, Strategija za borbu protiv korupcije, Strategija u oblasti migracija i azila, Strategija za rad policije u zajednici i Strategija reforme javne uprave.

Ciljevi i aktivnosti Strategije GP BiH su usaglašeni sa naprijed navedenim strategijama.

Potrebno je posebno naglasiti povezanost sa Strategijom integrisanog upravljanja granicom u BiH. Strategija IUG i Okvirni akcioni plan za period 2015 – 2018 u skladu su sa EU konceptom integrisanog upravljanja granicom. Ključni elementi IUG, granična kontrola, sprečavanje kriminala i model četveroslojnog pristupa, obuhvaćeni su u ovoj Strategiji, kao i obuka granične policije u skladu sa zahtjevima EU. Prioritet je usklađivanje zakonodavstva u oblasti bezbjednosti granica sa pravnom stečevinom EU, kako bi se pripremili za preuzimanje odgovornosti za obezbjeđenje spoljnih granica EU i usklađivanje sa zahtjevima Šengena.

Strategija GP je u funkciji realizacije obaveza BiH u procesu pridruživanja EU (Dokument EU partnerstvo sa BiH, Sporazum o stabilizaciji i pridruživanju).

Dokument Strateški okvir za BiH, koji je uzeo u obzir važeće strateške dokumente usvojene od strane Savjeta ministara BiH i obaveze prema Sporazumu o stabilizaciji i pridruživanju BiH u EU, predstavlja strateški okvir za pripremu Srednjoročnog programa rada Savjeta ministara BiH. Srednjoročni program rada Savjeta ministara je osnova za pripremu Srednjoročnog plana rada GP BiH.

2. Vizija i misija

GP BiH je upravna organizacija u okviru Ministarstva bezbjednosti BiH s operativnom samostalnošću, osnovana radi obavljanja policijskih poslova vezanih za nadzor i kontrolu prelaska granice BiH, i drugih poslova propisanih zakonom.

Vizija

GP BiH postaje moderna, inventivna, sposobna, ciljno orjentisana i profesionalna policijska agencija nadležna za obavljanje poslova granične kontrole, koja aktivno i mjerljivo doprinosi bezbjednosti BiH, regije Zapadnog Balkana i vanjskih granica Evropske unije i podržava sve mjere u prevenciji i borbi protiv svih oblika prekograničnog kriminala. GP je usmjerena na saradnju i zadovoljavanje potreba građana, te ispunjavanje zahtjeva za pridruživanje BiH Evropskoj uniji. Uposleni kontinuirano razvijaju kapacitete GP kroz korištenje moderne opreme, informacijskih tehnologija, telekomunikacija, inovacija, obuke i partnerskih odnosa utemeljenih na profesionalizmu i međusobnom uvažavanju.

Misija

GP BiH kao agencija za provedbu zakona održava i kontinuirano povećava nivo graničnih provjera i nadzora granice, kako bi zaštitili i podigli nivo sigurnosti granice, protoka ljudi, roba, usluga i kapitala preko državne granice BiH. GP svoje poslove obavlja u bliskoj saradnji sa ostalim agencijama za provedbu zakona u BiH i na polju međunarodne saradnje kao intenziviranom saradnjom Granične policije u zajednici.

3. Učesnici i partneri

GP BiH (ranije Državna granična služba) je uspostavljena na osnovu Zakona o Državnoj graničnoj službi koji je Odlukom iz 2000. godine donio Visoki predstavnik u BiH. Odredbama Zakona, koji je usvojen 2001. godine, uspostavljena je DGS BiH radi vršenja poslova zaštite granice i bezbjednosti vazdušnih luka. Pravilnikom o unutrašnjoj organizaciji iz 2005. godine utvrđene su organizacione jedinice GP BiH.

U 2007. godini promijenjen je naziv „Državna granična služba“ u „Granična policija BiH“. Izmjenama i dopunama Pravilnika o unutrašnjoj organizaciji GP BiH od 18.12.2013. godine uspostavljen je Zajednički centar za analizu rizika (ZCAR) kao organizaciona jedinica GP BiH, Kancelarija za obuku i usavršavanje i

Kancelarija za internu reviziju kao organizacione jedinice na centralnom nivou. Izmjenama sistematizacije radnih mjesta poslovi unutrašnje koordinacije evropskih procesa iz nadležnosti GP BiH dodijeljeni su Kancelariji za strateško planiranje i evropske integracije, a poslovi analize rizike u GP BiH Odsjeku za kriminalističko-obavještajne, analitičke i poslove analize rizika u okviru CIK. Izmjenama Pravilnika o unutrašnjoj organizaciji povećan je broj izvršilaca – policijskih službenika za 87 zbog izmjena u režimu granične kontrole na granici sa Republikom Hrvatskom i planiranog proširenja jednog broja graničnih prelaza. Usvojenim izmjenama broj sistematizovanih radnih mjesta policijskih službenika u GP BiH je 2.426.

U svom radu GP BiH ostvaruje uspješnu saradnju sa svim institucijama i agencijama za provođenje zakona u Bosni i Hercegovini. Međuinstitucionalna saradnja je posebno izražena s institucijama uključenim u proces integrisanog upravljanja državnom granicom Bosne i Hercegovine (Ministarstvo bezbjednosti BiH, Služba za poslove sa strancima, Uprava za indirektno oporezivanje, Kancelarija za veterinarstvo BiH, Uprava za zaštitu zdravlja bilja BiH, Federalna uprava za inspeksijske poslove, Republička uprava za inspeksijske poslove RS, Vlada Brčko distrikta Bosne i Hercegovine). GP BiH uspješno saraduje i s drugim agencijama za provođenje zakona (Ministarstvo unutrašnjih poslova FBiH, Ministarstvo unutrašnjih poslova RS, Policija Brčko distrikta BiH, SIPA, OSA, kantonalna ministarstva unutrašnjih poslova, kao i nadležna tužilaštva i sudovi). GP BiH je potpisnica Sporazuma o uspostavljanju sistema elektronske razmjene podataka iz evidencija policijskih tijela i tužilaštava u BiH.

Između Ministarstva unutrašnjih poslova Republike Hrvatske i Ministarstva bezbjednosti Bosne i Hercegovine potpisan je Protokol o uspostavi zajedničkog kontakta centra na graničnom prelazu Bijača (u BiH) – Nova Sela (u RH). U Trebinju je 24.3.2014. godine otvoren Zajednički centar za policijsku saradnju BiH, Crne Gore i Republike Srbije, koji će pridonijeti efikasnijoj borbi protiv nezakonitih migracija i trgovine ljudima, kao i drugih pojava u vezi sa prekograničnim kriminalom.

GP BiH direktno, a i preko Direkcije za koordinaciju policijskih tijela BiH, ostvaruje stratešku saradnju s INTERPOL-om, EUROPOL-om, EUROJUST-om, SELEC-om, kao i drugim međunarodnim organizacijama.

4. Osnovna programska opredjeljenja

U okviru principa razvoja „**Upravljanje u funkciji rasta**“ definisan je jedan strateški cilj „**Ubrzati proces tranzicije i izgradnje kapaciteta**“.

Ovaj cilj ostvarit će se kroz realizaciju više srednjoročnih ciljeva, od kojih je GP BiH nadležna za realizaciju cilja „**Unaprjeđenje bezbjednosnog sektora u BiH sa aspekta odgovornosti i efikasnosti**“.

GP BiH je definisala svoj specifični cilj „**Kontinuirano povećavati nivo granične bezbjednosti i bezbjednosti vazdušnih luka**“ koji namjerava postići kroz realizaciju dva programa:

1. **Granična kontrola i sprečavanje prekograničnog kriminala i**
2. **Bezbjednost vazdušnih luka.**

U okviru navedenih programa definisano je više projekata kao skupovi povezanih aktivnosti koje zajedno doprinose realizaciji plana.

Program 1: Granična kontrola i sprečavanje prekograničnog kriminala

Projekt 1.1: Granična kontrola

Opis prioriteta

Granična kontrola podrazumijeva djelatnost koja se provodi na granici i koja se preduzima u slučaju namjeravanog prelaska ili neposredno nakon obavljenog prelaska državne granice, a koja se sastoji od graničnih provjera i nadzora granice. U kontekstu efikasnijeg vršenja poslova i zadataka, GP BiH mora povećati postojeći nivo organizovanosti, obučenosti i tehničke opremljenosti. Postojeća sistematizacija radnih mjesta je neadekvatna i datira iz 2005. godine. Izrađen je prijedlog novog Pravilnika o unutrašnjoj organizaciji GP BiH i njegovo usvajanje se očekuje tokom 2017. godine. Ovim prijedlogom jasno su razgraničena radna mjesta policijskih službenika na poslovima graničnih provjera i nadzora granice. Takođe, predložena je nova teritorijalna organizacija. U narednom periodu neophodno je izvršiti kadrovsku popunu i organizaciju rada prilagoditi novoj funkcionalnoj i teritorijalnoj organizaciji.

GP BiH posjeduje informacioni sistem graničnih provjera, koji je stavljen u funkciju 2012. godine i operativan na 57 graničnih prelaza. U toku su aktivnosti na unapređenju informacionog sistema za granične provjere, koji podrazumijeva instaliranje kamera za čitanje registarskih tablica na graničnim prelazima. Postojeći način evidentiranja događaja na državnoj granici, obrade i distribucije podataka i informacija potrebno je automatizovati i povećati mogućnosti pretraživanja i analiza baza podataka. Navedene aktivnosti treba da prati stalno unapređenje komunikacijske uvezanosti organizacionih jedinica GP BiH.

Granične provjere lica u željezničkom prometu mogu se obavljati u vozu ili na dugom mjestu izvan voza, zavisno od uslova i infrastrukture graničnog prelaza. GP BiH posjeduje mobilne čitače putnih isprava, međutim tehnička oprema i infrastruktura koja je od pomoći kod provjere u željezničkom prometu neadekvatna je i zastarjela. GP BiH preduzima odgovarajuće mjere nadgledanja i nadzora, s ciljem sprečavanja osoba u napuštanju voza prije graničnih provjera, ali te poslove još uvijek otežava nepostojanje sistema video i senzornog nadzora između granične linije i graničnog prelaza.

GP BiH obavlja poslove graničnih provjera na graničnim prelazima u riječnom prometu. Potrebno je unaprijediti saradnju s brodskim agentima, vlasnicima brodova i lučkom kapetanijom, s ciljem omogućavanja prethodne analize rizika i preduzimanja odgovarajućih mjera u svrhu brze provjere putnika i posada.

U cilju racionalizacije korištenja ljudskih potencijala na graničnim prelazima u vazdušnom prometu i zbog osiguravanja dovoljnog broja policijskih službenika za provođenje graničnih provjera u skladu sa EU standardima, potrebno je izvršiti reviziju organizacije i sistematizacije na ovim graničnim prelazima.

GP BiH provodi nadzor granice primjenom radnji i postupaka između graničnih prelaza i na graničnim prelazima izvan utvrđenog radnog vremena, kojima se sprečava izbjegavanje graničnih provjera. Poslovi nadzora državne granice obavljaju se u graničnom pojasu, koji obuhvata područje do 10 kilometara od granične linije u dubinu teritorija BiH. Analizom podataka vidljivo je da stanje pokrivenosti državne granice po bezbjednosnim sektorima nije adekvatno. Veliki broj određenih graničnih prijelaza i veliki broj osoba i vozila koja prelaze državnu granicu u odnosu na kapacitete i infrastrukturu kojom GP BiH raspolaže, direktno utiče na ograničenu prisutnost policijskih službenika u nadzoru državne granice. Nadzor granice treba provoditi konstantno, fleksibilno, nepredvidivo i na način da uvijek predstavlja veliku opasnost za prekršioce i počinioce krivičnih djela. Nadzor granice treba se temeljiti na analizi rizika. Usvojen je i parafiran Elaborat "Zaprečavanje puteva pogodnih za ilegalni prelazak državne granice između BiH i Republike Srbije motornim vozilima". Potrebno je ubrzati ove aktivnosti.

GP BiH ima uspostavljen sistem interne kontrole i internu reviziju. GP BiH ima obavezu uspostaviti sistem finansijskog upravljanja i kontrole koji podrazumjeva sistemsko upravljanje rizicima vezanim za ciljeve i poslovne procese u nadležnosti GP BiH. Ovim postupcima potrebno je obezbjediti ekonomično, djelotvorno i efikasno postizanje ciljeva i osigurati rad u skladu sa važećim zakonima, propisima i upravljačkim politikama.

Mjere:

- Kontinuirano vršiti prijem novih policijskih službenika i organizaciju rada u GP BiH prilagoditi novoj funkcionalnoj i teritorijalnoj organizaciji
- Sistematski razvijati, nadograđivati i održavati informacijsko - komunikacijski sistem GP BiH
 - ✓ Znavljanje informatičke opreme, povećanje kapaciteta i sigurnosti informacionog sistema
 - ✓ Implementacija projekta uspostave sistema za kontrolu i evidenciju motornih vozila na graničnim prijelazima, uključujući dalji razvoj aplikacije granične provjere – verzija 2
- Za efikasno vršenje graničnih provjera dalje razvijati neophodan komunikacijski i softverski sistem i provoditi obuku za upotrebu mobilnih čitača putnih isprava
 - ✓ Uspostaviti automatizovan sistem evidentiranja, pretraživanja i analize podataka i informacija o događajima na državnoj granici
 - ✓ Proširenje i održavanje komunikacijskih linkova
 - ✓ Izgradnja telefonskih centrala i integracija u sistem mobilne telefonske mreže

- Provoditi saradnju s brodskim agentima, vlasnicima brodova i lučkom kapetanijom, željezničkim osobljem, osobljem aviokompanija i BHDCA
- Pripremiti priručnik kojim će se objediniti i utvrditi sve procedure i postupanja GP BiH
- Učestvovati u projektu zaprečavanja lokacija na kojima postoji mogućnost nezakonitog prelaska granice s R.Srbijom i kontinuirano nadgledati postavljene zapreke na granici s R.Hrvatskom i Crnom Gorom
- Provoditi internu kontrolu i internu reviziju u GP BiH i uspostaviti sistem finansijskog upravljanja i kontrole

Projekt 1.2: Istrage i krim-obavještajni rad

Opis prioriteta

BiH se nalazi na južnom kraku "Balkanske rute" zbog čega je interesantna organizovanim kriminalnim grupama koje se bave prekograničnim kriminalom. Najizraženiji evidentirani oblici prekograničnog kriminala su krijumčarenje ljudi, narkotika, akciznih roba i oružja. Organizaciona jedinica na centralnom nivou, Centralna istražna kancelarija (CIK), nosilac je aktivnosti za borbu protiv organizovanog i prekograničnog kriminala. Na regionalnom i lokalnom nivou kriminalističko obavještajne poslove obavlja po jedan policijski službenik, dok poslove istraga obavlja više policijskih službenika, zavisno o veličini jedinice. Krim-obavještajna mreža GP BiH je pod centralizovanim nadzorom. Postojeće procedure za analizu rizika u GP BiH definisane su Uputstvom za analizu rizika u GP BiH. U skladu sa Uputstvom, analizu rizika u GP BiH provode timovi za analizu rizika na centralnom, regionalnom i lokalnom nivou. Na centralnom nivou izrađuje se strateška analiza rizika jednom godišnje, na regionalnom nivou izrađuje se operativna analiza rizika za period šest mjeseci i na lokalnom nivou taktička analiza rizika za period od tri mjeseca. Policijskim službenicima koji rade na poslovima granične kontrole nisu u dovoljnoj mjeri osigurani profili i pokazatelji rizika. Nedovoljno su razvijene procedure koje će izrađene analize rizika prenijeti u svakodnevne aktivnosti policijskih službenika. Nedostaci u vezi s nepostojanjem adekvatnog Pravilnika o unutrašnjoj organizaciji ogledaju se i u nepostojanju opisa radnih mjesta za analizu rizika. Profiliranjem treba utvrditi ciljeve djelovanja u svrhu optimalnog usmjeravanja mjera na taktičkom nivou. Informacije koje se odnose na pokazatelje rizika, rizične profile i tipične načine postupanja prekograničnog kriminala, sistematski prosljeđivati službenicima na lokalnom nivou.

Potrebno je nastaviti s poboljšavanjem postojeće saradnje kao i uspostavom novih oblika, kroz zajedničke grupe za kriminalističko obavještavanje i istrage, zajedničko korištenje baza podataka, zajedničku analizu rizika na svim nivoima i zajedničke programe obuke. Zajednički Centar za analizu rizika svoje aktivnosti provodi na temelju Pravila o radu zajedničkog Centra i Instrukcije za radne metode zajedničkog Centra. Međutim, postojeći IT sistem, način pristupa i razmjene podataka između uključenih agencija u okviru zajedničkog Centra ne doprinose efikasnijem radu Centra i izradi zajedničkih analiza rizika.

Mjere:

- Unaprijediti poslove analize rizika koja je strukturirana na strateškom, operativnom i taktičkom nivou
- U saradnji sa partnerskim agencijama u okviru ZCAR-a unaprijediti način pristupa i razmjene podataka i otkloniti nedostatke postojećeg IT sistema
- Provoditi kontinuiranu obuku uposlenih na krim obavještajnim poslovima
- Planirati i provoditi operativne akcije/ciljane pojačane kontrole na graničnim prelazima i u graničnom pojasu samostalno i sa drugima službama u BiH

Projekt 1.3: Opremanje i izgradnja infrastrukture

Opis prioriteta

GP BiH je opremljena osnovnom opremom koja se koristi na graničnim prelazima za kontrolu dokumenata, stvari i vozila i opremom za nadzor državne granice. Većina graničnih prelaza nije izgrađena i opremljena u skladu sa odredbama Pravilnika o standardima i uslovima izgrađenosti i opremljenosti graničnih prelaza i time su neuslovni za rad i obavljanje poslova i zadataka graničnih provjera, posebno u pogledu kapacitete za provođenje druge linije graničnih provjera. GP BiH treba biti uključena u aktivnosti planiranja izgradnje novih graničnih prelaza. Prilikom planiranja izgradnje novih, odnosno modernizacije postojećih graničnih prelaza na kopnenoj granici, treba voditi računa o tome da se infrastruktura na graničnim prelazima, broj kontrolnih kabina i traka, prostorija (uključujući i sredstva potrebna za osobe kojima je odbijen ulazak) itd., prilagode intenzitetu protoka putnika i kapacitetima koji postoje na graničnom prelazu u susjednoj zemlji (količini i kvaliteti), uzimajući u obzir procjenu budućeg razvoja.

Savjet ministara BiH je u aprilu 2017. godine donio Pravilnik o standardima i uslovima izgrađenosti i opremljenosti graničnih prelaza. Novim pravilnikom video nadzor na graničnim prelazima definiše se kao posebna oprema GP BiH u skladu s praksom zemalja EU. Evropska komisija kroz IPA projekt odobrila je finansijska sredstva za realizaciju projekta sistema video nadzora na međunarodnim graničnim prelazima u BiH. GP BiH je u okviru donatorskih sredstava Vlade Švajcarske osigurala finansijska sredstva za izradu tehničkog projekta instalacije sistema, uključujući specifikaciju opreme i potrebne radove.

Poboljšanje fiksnog i prenosivog tehničkog nadzornog sistema kopnene granice između graničnih prelaza koji su posebno ugroženi s aspekta ilegalnih migracija i krijumčarenja ljudi, omogućit će da GP BiH uspješno otkriva pokušaje nezakonitog prelaska državne granice i spriječi ugrožavanje državne granice. Raspoloživi radni prostori nisu u potpunosti funkcionalni i ne zadovoljavaju potrebe postojećih kapaciteta, kao ni kadrovske potrebe GP BiH. U skladu sa kadrovskom popunom i povećanju broja graničnih policajaca, koje je moguće očekivati u bliskoj budućnosti, navedenu infrastrukturu treba prilagoditi kako bi GP BiH normalno mogla obavljati svoje zadatke. U narednom periodu treba izraditi jedinstvene standarde za opremu po jedinicama, i to naročito za granične provjere

(za 1. i 2. liniju provjera) i za nadzor granice. Potrebno je nabavljati opremu za granične provjere na 1. i na 2. liniji provjera na graničnim prelazima, opremu za provođenje detaljnih kontrola na graničnim prelazima i opremu za nadzor granice u skladu sa važećim standardima, odnosno preporukama u Šengenskom katalogu za nadzor vanjskih granica, povratak i readmisiju (iz 2009. godine). Nabavljati i znavljati savremenu opremu za suzbijanje prekograničnog kriminala. Za optimalnu upotrebu opreme treba realizovati adekvatnu obuku te pratiti upotrebu opreme. Uspostaviti kontinuirano praćenje stanja opreme i njenog održavanja, te pravovremenog znavljanja.

Mjere:

- Izraditi analizu stanja i potreba za tehničkom opremom za poslove granične kontrole i suzbijanja prekograničnog kriminala
- Izvršiti rekonstrukciju, integraciju i proširenje sistema video-nadzora na graničnim prelazima
- Opremati granične prelaze u skladu sa planom kapitalnih ulaganja i definisanim prioritetima
- Opremati jedinice GP tehničkom opremom za nadzor granice u skladu sa planom kapitalnih ulaganja i definisanim prioritetima
- Redovno nabavljati novu specijalističku opremu potrebnu za obavljanje poslova istraga, posebnih istražnih radnji
- Kontinuirano praćenje stanja i korištenja specijalističke opreme
- Izraditi jedinstvene standarde za opremu koju koristi GP BiH u skladu sa Preporukama za unapređenje tehničkih kapaciteta i opreme GP BiH
- Izraditi analizu stanja i potreba za izgradnjom i rekonstrukcijom infrastrukture
- Izgradnja smještajnih kapaciteta GP BiH u skladu sa planom kapitalnih ulaganja i definisanim prioritetima
- Koordinirati rad na izgradnji infrastrukture i neophodnih instalacija na graničnim prelazima, u skladu sa definisanim standardima

Projekt 1.4: Međuinstitucionalna i međunarodna saradnja

Opis prioriteta

S ciljem uspostave i unapređenja saradnje, GP BiH postupa u skladu sa potpisanim sporazumima i memorandumima o saradnji s partnerskim agencijama u BiH. Pravni temelj za međuagencijsku saradnju u BiH postoji. GP BiH je potpisala Sporazum o uspostavljanju sistema elektronske razmjene podataka iz evidencija policijskih tijela i tužilaštava, na temelju kojeg je direktor GP BiH donio Pravilnik o sadržaju i načinu vođenja evidencija i Uputstvo o načinu pristupa evidencijama i razmjeni podataka iz evidencija koje su predmet Sporazuma. U narednom periodu potrebno je osigurati pristup svim relevantnim bazama podataka

(nacionalnim i partnerskih agencija) u skladu sa nacionalnim zakonodavstvom i nadležnostima partnerskih agencija za provedbu zakona. Saradnju sa agencijama za provedbu zakona u BiH treba unaprijediti, posebno u dijelu otklanjanja preklapanja, razmjene i pristupa informacijama, zaštite podataka, zajedničkih aktivnosti, zajedničke analize rizika, razmjene iskustava, zajedničke obuke, zajedničkog korištenja ili ustupanja opreme i međuagencijskih kontakt tački na svim nivoima. Intenzivirati saradnju s ministarstvima, civilnim organizacijama, javnim i privatnim kompanijama, poput organizacija koje se bave nezakonitim migracijama, zaštitom žrtava trgovanja ljudima te javnim prevoznicima, telekom operaterima, špediterima i sl..

Međunarodna saradnja je obaveza GP BiH koja proizlazi iz Zakona o Graničnoj policiji i na temelju konvencija UN, EU i potpisanih sporazuma o policijskoj saradnji. Međunarodna policijska saradnja je intenzivirana i evidentan je trend porasta međunarodnih aktivnosti u kojima GP BiH aktivno učestvuje. Međutim, nisu iskorišteni svi kapaciteti za saradnju s organizacijama kao što je INTERPOL, EUROPOL, DCAF, SELEC i dr. U narednom periodu biće potrebno unaprijediti kapacitete za saradnju sa Kancelarijom evropske policije u kontekstu potpisanih sporazuma o operativnoj i strateškoj saradnji BiH i EUROPOL-a i upućivanju oficira za vezu u Kancelariju evropske policije u Hagu. Potrebno je povećati stručnost i profesionalnost službenika, naročito iz znanja engleskog i drugih stranih jezika, kako bi mogli adekvatno učestvovati u aktivnostima međunarodne saradnje. Saradnja s FRONTEX-om odvija se na temelju "Radnog sporazuma o uspostavljanju operativne saradnje između Ministarstva bezbjednosti i Evropske agencije za graničnu i obalsku stražu (FRONTEX)". Saradnja se odvija na područjima obuke, zajedničkih operacija i analize rizika.

Od naročitog značaja za bezbjednost i zaštitu državne granice je intenzivna saradnja sa susjednim zemljama. S Republikom Hrvatskom je sklopljen Sporazum o saradnji u nadzoru državne granice i na temelju njega sklopljena su četiri provedbena protokola. U praksi se provode mješovite patrole i službeni tranzit, a upućivanje oficira za vezu i osnivanje zajedničkih radnih grupa za suzbijanje kriminaliteta se ne provodi. Između Ministarstva unutrašnjih poslova Republike Hrvatske i Ministarstva bezbjednosti BiH potpisan Protokol o uspostavi zajedničkog kontakt centra na graničnom prelazu Bijača (u BiH) – Nova Sela (u RH), kojim su određena nadležna tijela, svrha, način rada i zadaci. S Crnom Gorom i Republikom Srbijom su na osnovu Konvencije o policijskoj saradnji zemalja jugoistočne Evrope sklopljeni protokoli o zajedničkim patrolama uz zajedničku državnu granicu. Te patrole se provode u praksi. U Trebinju je otvoren Zajednički centar za policijsku saradnju BiH, Crne Gore i Republike Srbije, koji će pridonijeti efikasnijoj borbi protiv nezakonitih migracija i trgovine ljudima, kao i drugih pojava u vezi sa prekograničnim kriminalom. Potpisan je Poslovnik o radu Zajedničkog centra.

Mjere:

- Održavanje i unapređenje sistema za elektronsku razmjenu podataka između policijskih agencija
- Sarađivati sa agencijama u BiH kroz zajedničke grupe za krim. obavještanje i istrage, zajedničku upotrebu baza podataka, zajedničku analizu rizika na svim nivoima i zajedničke sastanke i programe obrazovanja i obuke

- Provoditi sporazumima regulisane institute prekogranične policijske saradnje, uključujući zajedničke/mješovite patrole, usklađene /pojačane kontrole, zajedničke operacije, sastanci i razmjena informacija
- Uspostava direktnih telefonskih linija ili radio veza između susjednih graničnih prelaza
- Saradivati sa ministarstvima i partnerskim agencijama unutar BiH u realizaciji projekta uvođenja biometrije u oblast viza, boravišnih dozvola i azila
- Unaprijediti rad zajedničkih centara na granici sa susjednim zemljama i nastaviti s uspostavom zajedničkih kontaktnih tačaka
- Provoditi saradnju s FRONTEX-om u skladu sa potpisanim radnim dogovorom
- Razvijati kapacitete za saradnju sa EUROPOL-om u kontekstu potpisanih sporazuma o operativnoj i strateškoj saradnji i upućivanju oficira za vezu
- Učešće u realizaciji regionalnih i međunarodnih projekata sa drugim partnerskim organizacijama i agencijama (ICITAP, IPA projekti, Twinning projekti, projekti u okviru bilateralne saradnje i sl.)

Projekt 1.5: Obuka i stručno usavršavanje

Opis prioriteta

Prema odredbama Zakona o policijskim službenicima BiH, obrazovanje policijskih službenika vrši se kroz osnovnu obuku i kroz stručno usavršavanje. Osnovna obuka se provodi od strane Agencije za školovanje i stručno usavršavanje kadrova, dok se kontinuirano-stalno stručno usavršavanje provodi u GP BiH.

GP BiH je raspisala oglase za prijem 150 kadeta za I nivo školovanja i 20 kadeta II nivoa školovanja i početak osnovne obuke očekuje se tokom 2017. godine. Sistem napredne obuke u GP BiH postoji. Izrađen je Nastavni plan i program obuke GP BiH koji obuhvata obuke u rukovanju vatrenim oružjem i izvođenjem kvalifikacionog gađanja, obuke iz oblasti razvijanja i provjere motoričkih sposobnosti i obuke iz oblasti izvršavanja policijskih poslova i primjene policijskih ovlašćenja. Obuke se izvode u slobodnom vremenu službenika, prije ili nakon radnog vremena ili u slobodne dane, što utiče na smanjenje spremnosti i motivacije kod službenika. Stoga je neophodno pružiti bolju administrativnu podršku, u smislu usklađivanja rasporeda i omogućavanja službenicima da usklade ponuđenu obuku sa svojim radnim obavezama i organizuju termine u sklopu radnog vremena. Takođe službenicima nije omogućeno u okviru radnog mjesta imati pristup stručnoj literaturi, brošurama i potrebnim materijalima. U GP BiH ne postoji adekvatan sistem trenera, odnosno multiplikatora. U organizacionim jedinicama na terenu nedostaju prostorije u kojima bi se mogla održavati obuka. Obuka se organizuje u nenamjenskim prostorijama, te se javlja problem postavljanja i upotrebe opreme i tehničkih pomagala.

Specijalističku obuku pripadnika GP BiH treba planirati putem sistema multiplikatora za područja: otkrivanje falsifikovanih dokumenata, suzbijanje krijumčarenja ljudi, vozila, opojnih droga i predmeta, EU i Schengensko pravo, analiza rizika te korištenje informacionog sistema za granične provjere. Neophodno je osigurati uslove za e-učenje i uspostaviti e-baze s materijalima za učenje, organizovati kurseve za znavljanje /osvježavanje znanja. Obuke stranih jezika i rada na računaru treba intenzivirati i provoditi kontinuirano.

GP BiH pridaje veliki značaj razvoju informacijskih i komunikacijskih tehnologija (ICT). Pored tehničkih kapaciteta ovo zahtjeva i dovoljan broj osoblja i adekvatno znanje. Iz tog razloga potrebno je obezbjediti ICT obuku za državne službenike i zaposlenike iz područja informatike i telekomunikacija.

Mjere:

- Realizovati aktivnosti u vezi sa školovanjem i upošljavanjem policijskih kadrova za potrebe GP BiH
- Kontinuirano provoditi obuku u skladu sa nastavnim planovima i programima obuke i vršiti provjere znanja i stručnosti
- Uspostava sistema trenera/multiplikatora u okviru procesa osposobljavanja i stručnog usavršavanja
- Razvijati sistem obuke za područje analize rizika
- Osigurati uslove za e-učenje i uspostaviti e-baze s materijalima za učenje
- Provoditi obuke stranih jezika i rada na računaru
- Planirati i provoditi stalnu edukaciju za ICT osoblje

Program 2: Bezbjednost vazdušnih luka

Projekt 2.1: Bezbjednosni pregled putnika, kabinskog prtljaga i obezbjeđenje prostora

Opis prioriteta

U organizacionoj strukturi GP BiH bezbjednost civilnog vazduhoplovstva provodi se na centralnom, regionalnom i lokalnom nivou. Na centralnom nivou poslovi bezbjednosti civilnog vazduhoplovstva obavljaju se u Upravi za operacije - Odsjek za nadzor granice i bezbjednost aerodroma, gdje na tim poslovima radi jedan policijski službenik. Terenska kancelarija za aerodrome je organizovana na regionalnom nivou i ima područje djelovanja u međunarodnim vazdušnim lukama u Banja Luci, Mostaru, Sarajevu i Tuzli. Poslovi iz nadležnosti terenske kancelarije vrše se u okviru unutrašnjih organizacionih jedinica na lokalnom nivou, a to su

jedinice Granične policije. Nadležnost djelovanja jedinica je područje međunarodne vazdušne luke koja ujedno predstavlja i područje graničnog prelaza, koji čini bezbjednosni sektor u vazdušnoj luci. Unutar jedinica organizovani su timovi za obavljanje poslova kontrole putnih isprava putnika, protivdiverzionu kontrolu osoba i prtljaga i poslove osiguranja objekata i površina u vazdušnoj luci. Specifičnost organizacije je anti-bombni tim koji djeluje u svim vazdušnim lukama u okviru nadležnosti Terenske kancelarije, a u sastavu je JGP Aerodrom Sarajevo.

Osnov za provođenje većine mjera bezbjednosti civilnog vazduhoplovstva crpe se iz Programa bezbjednosti civilnog vazduhoplovstva BiH koji nema zakonsku snagu. Pored toga, u svim vazdušnim lukama nisu donesene sve potrebne standardne procedure, u skladu sa Programom bezbjednosti koji obuhvata odredbe međunarodnih standarda za civilno vazduhoplovstvo (ICAO i ECAC standardi).

U pogledu interne kontrole kvalitete sistema bezbjednosti na međunarodnim aerodromima u BiH, službenici ovlašteni za provođenje interne kontrole postupaju u skladu sa Programom interne kontrole kvaliteta sistema bezbjednosti GP BiH na međunarodnim aerodromima u BiH. Program osigurava istovjetnost mjera, radnji i postupanja interne kontrole u oblastima bezbjednosti aerodroma, bezbjednosti vazduhoplova, putnici i ručni prtljag, kontrola odvojenog prtljaga, generalna avijacija, upravljanje odgovorom na djela nezakonitog ometanja, upravljanje odgovorom na hitne situacije i izdavanje dozvola za kretanje i zadržavanje lica i vozila na području aerodroma.

Opremljenost bezbjednosnom opremom nije na istom nivou u svim međunarodnim vazdušnim lukama. Nedostaje specijalističke opreme za KD kontrolu novije generacije. Postoji relativno dobra struktura opreme koja se koristi za kontradiverzione (KD) preglede ali se ista u narednom periodu treba osavremeniti. Opremu u vlasništvu GP BiH koja se koristi za poslove bezbjednosti vazdušnih luka, potrebno je blagovremeno servisirati i izvršiti završavanje iste. Potrebno je osigurati neophodna materijalno - tehnička sredstva za efikasno obavljanje poslova iz područja bezbjednosti vazdušnih luka.

Mjere:

- Izraditi analizu postojećih procedura na svim graničnim prelazima u skladu sa Programom bezbjednosti civilnog vazduhoplovstva, ICAO i ECAC standardima i preporukama
- Realizacija planova interne kontrole kvaliteta (godišnji i mjesečni)
- Kontinuirano pratiti stanje i korištenje specijalističke opreme za poslove sigurnosti vazdušnih luka, oprema u vlasništvu GP BiH i oprema u vlasništvu operatera
- Sistematski raditi na održavanju postojeće i nabavci nove specijalističke opreme
- Jačati postojeću saradnju s relevantnim službama u vazdušnim lukama
- Kontinuirano praćenje provedbe planova pojačanog nadzora tzv. rizičnih letova na ulasku u BiH i njihova revizija po potrebi

Projekt 2.2: Obuka i certificiranje policijskih službenika

Opis prioriteta

Obuka policijskih službenika za sve poslove iz područja sigurnosti vazdušnih luka nije organizovana u dovoljnom obimu (seminari, specijalistički tečajevi). Potrebno je održati kontinuitet postojećih obuka, te poboljšati kvalitet obuka na kojima će se pratiti napredak i primjena organizacijskih i tehničko - tehnoloških dostignuća u svijetu. Realizovati trening programe/dresuru policijskih pasa za otkrivanje eksplozivnih materijala i policijskih pasa za otkrivanje narkotičkih sredstava, i provesti obuke za policijske službenike koji rade na poslovima vodiča policijskih pasa. GP BiH je u saradnji sa operaterom Aerodrom Sarajevo uspostavila sistem povratne obuke (osvježenja stečenih znanja) u području sigurnosti aerodroma, kao i certificiranje zaposlenih policijskih službenika na KDZ, uz redovno praćenje učinaka provedenih obuka. Kao problem se pojavljuje nedostatak verifikovanih predavača u GP BiH ili predavača s određenim zvanjima kojima bi Direkcija za civilno vazduhoplovstvo Bosne i Hercegovine (BHDCA) mogla verifikovati plan i program predavanja u skladu s Programom bezbjednosti civilnog vazduhoplovstva BiH.

Mjere:

- Razvijati sistem povratne obuke (osvježenja stečenih znanja) i specifične obuke iz područja sigurnosti vazdušnih luka
- Pratiti stanje sertifikacije službenika u jedinicama GP i provoditi obuku u saradnji sa BHDCA
- Kontinuirano provoditi internu obuku u jedinicama GP

5. Resursi i kapaciteti potrebni za postizanje ciljeva

GP BiH nastoji ojačati kapacitete i postići najbolje prakse zemalja Evropske unije, te ispuniti svoje obaveze u pogledu stvaranja uslova za slobodno i nesmetano kretanje ljudi i promet robe preko granice. GP BiH jasno iskazuje svoju opredjeljenost za borbu protiv korupcije i svih vidova zloupotrebe službenog položaja. Svoje aktivnosti GP BiH će provoditi uz punu profesionalnu saradnju sa svim državnim institucijama, građanima, vladinim i nevladinim organizacijama i drugim institucijama koji djeluju ili su po bilo kom osnovu vezani za graničnu bezbjednost. Na ovaj način GP BiH će dati svoj puni doprinos procesu tranzicije, stabilizacije i pridruživanja BiH Evropskoj uniji i transatlantskim integracijama.

GP BiH ima uspostavljenu organizacijsku strukturu u čijoj nadležnosti je otkrivanje i suprotstavljanje nezakonitim migracijama i prekograničnom kriminalitetu na centralnom, regionalnom i lokalnom nivou. Istražni kapaciteti GP BiH izgrađeni su u skladu sa EU standardima. GP BiH je ovlaštena provoditi istražne radnje na cijeloj teritoriji BiH po nalogu Suda BiH i Tužilaštva BiH. Ovo se odnosi na sva druga krivična djela koja su u vezi s granicom, odnosno krivična djela koja su od strane nadležnog tužioca dodijeljena GP BiH za istraživanje i procesuiranje.

Pravilnikom o unutrašnjoj organizaciji GP BiH predviđeno je 2.646 zaposlenih. Trenutna popunjenost radnih mjesta iznosi 81,29%.

Tabela: Stanje zaposlenih na dan 31.03.2017.

Opis	Broj	Udio %
Policijski službenici	1.948	90,56
Državni službenici	52	2,42
Uposlenici	150	6,97
Pripravnici	1	0,05
Ukupno	2.151	100

Tabela: Struktura popunjenosti radnih mjesta

Opis	Broj nepopunjenih radnih mjesta	Broj sistematizovanih radnih mjesta	% u odnosu na sistematizovani broj
Policijski službenici	478	2.426	19,70
Državni službenici	5	57	8,77
Uposlenici	13	163	7,98
Ukupno	496	2.646	18,75

Realizacija aktivnosti umogome će zavistiti od raspoloživih budžetskih sredstava. S obzirom na njihovu ograničenost koristit će se finansijska pomoć i velika podrška međunarodnih organizacija i institucija u naporima da se uspostavi integrisani sistem granične bezbjednosti u BiH.

6. Okvir za praćenje provođenja plana i evaluacija rezultata

U budžetskoj 2015. godini, Direkcija za ekonomsko planiranje BiH izradila je dokument Strateški okvir za BiH kojim su definisani opšti, strateški i srednjoročni ciljevi/prioriteti. GP BiH je definisala svoj specifičan cilj i razvila set pokazatelja za utvrđivanje stepena ostvarenja zacrtanih ciljeva. Nakon izrade Srednjoročnog programa rada Savjeta ministara BiH, GP BiH je izradila svoj Srednjoročni plan rada za period 2018. - 2020. godina.

Tabela: Pokazatelji uspjeha/rezultata

Ciljevi/Programi	Pokazatelj	Jedinica mjerjenja	Polazna vrijednost 2017.	Ciljana vrijednost 2018.	Ciljana vrijednost 2019.	Ciljana vrijednost 2020.
Srednjoročni cilj: Unaprijeđenje bezbjednosnog sektora u BiH sa aspekta odgovornosti i efikasnosti	Broj otkrivenih nezakonitih radnji (krivična djela i prekršaji) na granici	Broj	2.300 (300 krivičnih djela i 2.000 prekršaja)	2.320 (310 krivičnih djela i 2.010 prekršaja)	2.340 (320 krivičnih djela i 2.020 prekršaja)	2.350 (325 krivičnih djela i 2.025 prekršaja)
	Pozitivne ocjene provedenih internih nadzora stanja sistema sigurnosti i zaštite/testova mjera sistema sigurnosti i zaštite: Sarajevo/Banjaluka/Mostar/Tuzla	Broj	4/4	4/4	4/4	4/4
Specifični cilj: Kontinuirano povećavati nivo granične bezbjednosti i bezbjednosti vazdušnih luka	Procenat povećanja otkrivenih falsifikovanih dokumenta	%	150	10% (165)	10% (180)	5% (190)
	Procenat uspješnih intervencija uklanjanja sumnjivog i napuštenog prtljaga	%	100	100	100	100
Program 1: Granična kontrola i sprječavanje prekograničnog kriminala	Procenat otkrivenih pokušaja ilegalnog prelaska lica u odnosu na ukupno evidentirana lica (uključujući lica u readmisiji)	%	80	83	85	87
	Broj evidentiranih/ otkrivenih prelazaka lica sa potraga	Broj	3.200	3.210	3.220	3.230
	Broj izvještaja o počinjenim KD	Broj	250	270	280	290

	podnesenih nadležnim tužilaštvima					
	Procenat realizacije Plana javnih nabavki	%	100	100	100	100
	Procenat realizacije Plana zajedničkih / mješovitih patrola	%	100	100	100	100
	Prosječan broj sati obuke po službeniku	Broj	35	40	45	50
Program 2: Bezbjednost vazdušnih luka	Pozitivne ocjene provedenih internih inspekcija sigurnosti na međunarodnim aerodromima: Sarajevo/Banjaluca/Mostar/Tuzla	Broj	12/12/12/12	12/12/12/12	12/12/12/12	12/12/12/12
	Procenat izvršenih fizičkih pregleda putnika i kabinskog prtljaga u odnosu na ukupan promet putnika na međunarodnim aerodromima	%	11/11	12/12	12/12	13/13
	Procenat sertifikovanih policijskih službenika na poslovima KDZ kontrole (osnovna i povratna obuka)	%	100	100	100	100

Izvršenje Srednjoročnog plana rada GP BiH pratiće se putem redovnih godišnjih izvještaja na osnovu izvještaja o izvršenju godišnjih planova rada. Podatke o provođenju Srednjoročnog plana rada prikupljat će Kancelarija za strateško planiranje i evropske integracije. Izvještaj o provođenju Srednjoročnog plana rada izrađuje Kancelarija za strateško planiranje i evropske integracije u propisanom formatu i roku.

Svake tri godine GP BiH priprema Izvještaj o evaluaciji provođenja Srednjoročnog plana rada. Evaluaciju u GP BiH vrši Kancelarija internog revizora u skladu sa Uputstvom o metodologiji u postupku srednjoročnog planiranja, praćenja i izvještavanja u institucijama BiH.

7. Akcioni plan Srednjoročnog plana rada Granične policije BiH

A) Akcioni plan srednjoročnog plana rada

AKCIONI PLAN SREDNJOROČNOG PLANA RADA GRANIČNE POLICIJE BOSNE I HERCEGOVINE 2018-2020																					
Opći cilj / principi razvoja:		UPRAVLJANJE U FUNKCIJI RASTA																			
Strateški cilj:		Ubrzati proces tranzicije i izgradnje kapaciteta																			
1	2	3	4	5	6	7	8	9	10	11	12	13	14	15	16	17	18	19	20	21	
Srednjoročni cilj	Specifični ciljevi	Programi	Projekt	Institucija odgovorna za implementaciju	Okvir za mjerenje ostvarenja					Procjena troškova				Izvori finansiranja					Program u DOB-u		
					Pokazatelj	Jedinica mjerenja (% broj ili opisano)	Polazna vrijednost godina 2017	Ciljana vrijednost godina 2018	Ciljana vrijednost godina 2019	Ciljana vrijednost godina 2020	Procijenjeni troškovi godina 2018	Procijenjeni troškovi godina 2019	Procijenjeni troškovi godina 2020	Ukupno troškovi	Budžet	Krediti	Donacije	Ostali izvori		Ukupno	
Srednjoročni cilj 1*				Granična policija BiH	Broj otkrivenih nezakonitih radnji (krivična djela i prekršaji) na granici	Broj	2.300 (300 krivičnih djela i 2.000 prekršaja)	2.320 (310 krivičnih djela i 2.010 prekršaja)	2.340 (320 krivičnih djela i 2.020 prekršaja)	2.350 (325 krivičnih djela i 2.025 prekršaja)											
					Pozitivne ocjene provedenih internih nadzora stanja sistema sigurnosti i zaštite/testova mjera sistema sigurnosti i zaštite: Sarajevo/Banjaluka/Mostar/Tuzla	Broj	4/4	4/4	4/4	4/4											
Unaprjeđenje bezbjednosnog sektora u BiH sa aspekta odgovornosti i efikasnosti	Specifični cilj 1.1			Granična policija BiH	Procenat povećanja otkrivenih falsifikovanih dokumenta	%	150	10% (165)	10% (180)	5% (190)											
					Procenat uspješnih intervencija ukidanja sumnjivog i napuštenog prtljaga	%	100	100	100	100	77.570.000	75.015.000	78.123.000	230.708.000	230.708.000					230.708.000	
	Kontinuirano povećavati nivo granične bezbjednosti i bezbjednosti vazdušnih luka	Program 1.1.1 Granična kontrola i sprječavanje prekograničnog kriminala		Granična policija BiH	Procenat otkrivenih pokušaja ilegalnog prelaska lica u odnosu na ukupno evidentirana lica (uključujući lica u redmisiji)	%	80	83	85	87	73.225.000	70.904.000	73.885.000	218.014.000	218.014.000					218.014.000	0310340 Granična kontrola i sprječavanje prekograničnog kriminala; 0310140 Upravljački kapaciteti, strateško planiranje i administracija GP
				Projekt 1.1.1.1 Granična kontrola	Broj evidentiranih/otkrivenih prelazaka lica sa potraga	Broj	3.200	3.210	3.220	3.230	57.900.000	58.060.000	61.000.000	176.960.000	176.960.000					176.960.000	
				Projekt 1.1.1.2 Istraga i krim obavještajni rad	Broj izvještaja o počinjenim KD podnesenih nadležnim tužilaštvima	Broj	250	270	280	290	5.600.000	5.600.000	5.900.000	17.100.000	17.100.000					17.100.000	
				Projekt 1.1.1.3 Opremanje i izgradnja infrastrukture	Procenat realizacije Plana javnih nabavki	%	100	100	100	100	8.000.000	5.500.000	5.100.000	18.600.000	18.600.000					18.600.000	
				Projekt 1.1.1.4 Međuinstitucionalna i međunarodna saradnja	Procenat realizacije Plana zajedničkih / mješovitih patrola	%	100	100	100	100	1.220.000	1.224.000	1.300.000	3.744.000	3.744.000					3.744.000	
				Projekt 1.1.1.5 Obuka i stručno usavršavanje	Prosječan broj sati obuke po službeniku	Broj	35	40	45	50	505.000	520.000	585.000	1.610.000	1.610.000					1.610.000	
	Program 1.2.1 Bezbjednost vazdušnih luka		Granična policija BiH	Pozitivne ocjene provedenih internih inspekcija sigurnosti na međunarodnim aerodromima: Sarajevo/Banjaluka/Mostar/Tuzla	Broj	12/12/12/12	12/12/12/12	12/12/12/12	12/12/12/12	4.345.000	4.111.000	4.238.000	12.694.000	12.694.000					12.694.000	0310120 Bezbjednost vazdušnih luka; 0310140 Upravljački kapaciteti, strateško planiranje i administracija GP	
			Projekt 1.2.1.1 Bezbjednosni pregled putnika, kabinske prtljage i obezbjeđenje prostora	Procenat izvršenih fizičkih pregleda putnika i kabinskog prtljaga u odnosu na ukupan promet putnika na međunarodnim aerodromima	%	11/11	12/12	12/12	13/13	3.555.000	3.313.000	3.412.000	10.280.000	10.280.000					10.280.000		
		Projekt 1.2.1.2 Obuka i sertifikiranje policijskih službenika	Procenat sertifikovanih policijskih službenika na poslovima KDZ kontrole (osnova i povratna obuka)	%	100	100	100	100	790.000	798.000	826.000	2.414.000	2.414.000					2.414.000			

B) Pregled zakona, drugih propisa i razvojno-investicionih projekata/programa

PREGLED ZAKONA, DRUGIH PROPISA I RAZVOJNO-INVESTICIONIH PROJEKATA/PROGRAMA PREDVIĐENIH SREDNJOROČNIM PROGRAMOM RADA VIJEĆA MINISTARA							
Opći cilj / principi razvoja:		UPRAVLJANJE U FUNKCIJI RASTA					
Strateški cilj:		Ubrzati proces tranzicije i izgradnje kapaciteta					
1	2	3	4	5	6	7	8
Srednjoročni cilj	Programi	ZAKONI	PODZAKONSKI AKTI	Usklađivanje s pravnim naslijeđem EU-a (DA ili NE)	Planirani period za DONOŠENJE	NAZIV PROJEKTA JAVNIH INVESTICIJA	Očekivani PERIOD REALIZACIJE
Srednjoročni cilj 1 Unaprijeđenje bezbjednosnog sektora u BiH sa aspekta odgovornosti i efikasnosti	Program 1.1 Granična kontrola i sprječavanje prekograničnog kriminala					IPBIH GP-1, Izgradnja smještajnih kapaciteta GP BiH	2020.
						IPBIH GP-2, Znavljanje informatičke opreme, povećanje kapaciteta i sigurnosti nformacionog sistema	2020.
						IPBIH GP-3, Proširenje i održavanje komunikacionih linkova	2020.
						IPBIH GP-5, Sistem za kontrolu i evidenciju motornih vozila na g/p	2019.
						IPBIH GP-6, Izgradnja telefonskih centrala i integracija u sistem mobilne telefonske mreže	2020.
						IPBIH GP-7, Radio sistem GP BiH	2020.
						IPBIH GP-8, Dokument menadžmet sistem	2018.
						IPBIH GP-9, Elektronska evidencija dosjea sektora	2018.
						IPBIH GP-10, Izrada projekta pokrivenosti TETRA u graničnom pojasu	2020.

Broj: 17-08-04-14-395- /17

Datum: 08.06.2017. godine

DIREKTOR
Glavni generalni inspektor

Zoran Galić